

Morning Dogri (NSD) Bulletin 22-05-2025

आकाशवाणी

- प्रधानमंत्री नरेंद्र मोदी होर राजस्थान च 26 ज्हार करोड़ रपे कोला मती लागत आहिलयें बक्ख-बक्ख विकास परियोजनाएं दा नी पत्थर रक्खडन ते उद्घाटन करडन।
- प्रधानमंत्री नरेंद्र मोदी होर अज्ज मुख भरै च अमृत भारत स्टेशन योजना तैहत 103 अमृत स्टेशनें दा उद्घाटन करडन।
- भारत नै पाकिस्तान आसेआ चलाए जा करदे आतंकवाद गी होर बेनकाव करने लेई कुल संसारी तेज अभियान दी शुरूआत करी दित्ती ऐ। सब्बनें पार्टियें आहलें दो डेलीगेशन कल 9एं मुखें दे दौरे लेई रवाना होई गेन।
- महाराष्ट्र दी सरकार नै ऐप आधारित कैब सेवा जियां ओला ते उबेर लेई लम्मे समें दा बलगी जा करदी नीति गी अधिसूचित करी दित्ता ऐ।
- निशानेबाज कनक नै ISSF जूनियर विश्व कप च सुन्ने दा तगमा जित्ती लैता ऐ।
- आई.पी.एल टी-20 क्रिकेट च मुम्बई इंडियन प्लेऑफ च शामिल होने आहली चौथी टीम बनी गई ऐ। जंदी रातीं खेड्डे गेदे मुकाबले च मुम्बई दी टीम नै दिल्ली कैपिटल गी 59 रन्जें कन्नै हराई दित्ता ऐ।

<><><><><><>

PM-Raj. Visit

प्रधानमंत्री नरेंद्र मोदी होर अज्ज राजस्थान दे बीकानेर दा दौरा लांगन जित्थे ओहू 26 ज्हार करोड़ रपे कोला मती लागत दी बक्ख-बक्ख विकास परियोजनाएं दा नी पत्थर रक्खंगन, उद्घाटन करंगन ते कई परियोजनाएं गी राष्ट्र गी समर्पित करंगन। इनें परियोजनाएं च रेलवे, शिड़क, उर्जा, पानी, नमीं ते परती-परतियै बरतोने आहली उर्जा क्षेत्र दियां परियोजनां शामिल ना। प्रधानमंत्री होर अपने दौरे दौरान 18एं जिलें च नमें सिरेआ तैयार कीते गेदे 103 अमृत स्टेशनें दा बी उद्घाटन करंगन। इन्दे चा 19 स्टेशन उत्तर प्रदेश च न जिंदे च अज्जै-कल्लै दियां सूलतां ना।

<><><><><><>

PM-Amrit Station

प्रधानमंत्री नरेंद्र मोदी होर अज्ज मुख्य भरै च अमृत भारत स्टेशन योजना तैहत 103 अमृत स्टेशनें दा उद्घाटन करंगन। प्रधानमंत्री होर मध्य प्रदेश च बी अमृत रेलवे स्टेशन योजना तैहत 6एं नमें स्टेशनें दा वीडियो कांफ्रेंसिंग राएं उद्घाटन करंगन। एहू स्टेशन न कत्ती साउथ, श्रीधाम, नर्मदापुरम, शाजापुर, सियोनी ते ओरघा।

<><><><><><>

Railways-Minister

रेल मंत्री अश्विनी वैष्णव होरें आखेआ ऐ जे अमृत भारत स्टेशन योजना तैहत नमें सिरेआ विकसित करने लेई 1300 रेलवे स्टेशनें दी पंछान कीती गई ऐ। कल बीकानेर च देशनोक

अमृत स्टेशन दे दौरे दौरान समाचार माध्यमें कन्नै गल्लबात करदे होई केंद्री मंत्री होरें आखेआ जे देशनोक स्टेशन गी इलाके दी मुकामी सांस्कृतिक विरासत ते वास्तुकला गी शामिल करदे होई तैयार कीता गेआ ऐ। श्री वैष्णव होरें आखेआ जे पहले बैच मगरा आने आहले 8एं म्हीने ते 2027 तोड़ी 100 होर अमृत स्टेशन तैयार होई जांगन। एहदे कन्नै तकरीबन 500 स्टेशन नमें सिरेआ विकसित होई जांगन।

<><><><><><>

APD

भारत नै पाकिस्तान आसेआ चलाए जा करदे आतंकवाद गी होर बेनकाव करने लेई कुल संसारी स्तरै पर अपने तेज अभियान दी शुरूआत करी दिती ऐ। सब्बनें पार्टियों दी शमूलियत आहले दो डैलीगेशन कल 9एं मुल्ले दौरे करणे लेई रवाना होई गेन। जनता दल यूनाइटेड दे सांसद संजय कुमार झा हुंदी अगुवाई आहला डैलीशन 5एं मुल्ले इंडोनेशिया, मलेशिया, दक्खण कोरिया, जपान ते सिंगापुर दे दौरे लेई रवाना होई गेआ ऐ। आप्रेशन सिंदूर दे मगरा भारत दी कूटनीतिक पहुंच दे तौर पर इयां कीता जा करदा ऐ।

शिवसेना दे सांसद श्रीकांत शिंदे हुंदी अगुवाई आहला दुआ डैलीगेशन संयुक्त अरब अमीरात, लिबेरिया, कांगो ते Sierra Leone दे दौरे पर गेआ ऐ। एहदे कन्नै सब्बै चाल्ली दे आतंकवाद कन्नै निब्वडने दे भारत दे धेइयै गी पक्का कीता जाग।

<><><><><><>

Pak-Official

भारत नै नमी दिल्ली स्थित पाकिस्तान उच्चायोग च कम्म करा'रदे इक पाकिस्तानी अधिकारी गी आधिकारिक स्थिति मूजब नेई होने आहली गतिविधिएं च शामिल होने करी

अवांछित घोषित करी दित्ता ऐ। अधिकारी गी 24 घंटे दे अंदर-अंदर भारत छोड़ने लेई आखेआ गेआ ऐ। विदेश मंत्रालय नै आखेआ ऐ जे पाकिस्तान उच्चायोग दे प्रभारी गी इस सरबंधै च इक आपत्ति पत्र जारी कीता गेआ ऐ। औदे च एहू यकीनी करने आस्तै आखेआ गेआ ऐ जे भारत च कोई बी पाकिस्तानी राजनयिक या अधिकारी कुसै बी चाल्ली कन्नै अपने विशेषाधिकारें दा गलत इस्तेमाल नेई करै।

<><><><><><>

EAM-Denmark

विदेश मंत्री डॉ. एस जयशंकर होरें कल कोपेनहेगन च डेनमार्क दे उद्योग, बपार ते आर्थिक मामलें सरबन्धी मंत्री मोर्टेन बोडस्कोव हुंदे कन्नै मुलाकीत कीती।

दौनें धड़ें मौजूदा साथ-सहयोग गी होर डूंगा करने ते नमीं संभावना तलाशने बारै गल्लबात कीती। विदेश मंत्री जयशंकर होर डेनमार्क दी संसद दे स्पीकर सोरेन गोडे हुंदे कन्नै बी मिले। डॉ. जयशंकर होरें इक सोशल मीडिया पोस्ट च आतंकवाद कन्नै तगड़ेयाई कन्नै निब्बड़ने च भारत कन्नै डेनमार्क दी इकजुटता दी तरीफ कीती।

<><><><><><>

Maha-Cab Policey

महाराष्ट्र सरकार नै ओला ते उबेर जनेहू ऐप आधारित कैब सेवाएं आस्तै नीति घोषित करी दित्ती ऐ। एहूदे च कराए, डरैवर दी सिखलाई, इलेक्ट्रिक गड्डिणं गी अपनाने ते यात्रा रद्द करने पर जुर्माना लाना बी शामिल कीता गेआ ऐ। एहूदा मकसद सवारी ते डराइवर दौनें आस्तै इक बरोबर व्यवहार ते यात्रा दे अनुभव गी सैहज बनाना ऐ। दिशा-निर्देशें मूजब जेकर उबेर या ओला दा डरैवर बिजन कुसै वैध वजह करी बुकिंग रद्द करी दिंदा ऐ तां डरैवर पर कराए दा 10 फीसद या 100 रपे दा जुर्माना लाया जाग। इस्सै चाल्ली जेकर यात्री बिजन

जायज वजह दे बुकिंग गी रह करदा ऐ तां फी उसी डरैवरी गी कराए दा 5 फदसद या 50 रपे दा जुर्माना देना होगा।

<><><><><><>

PM-MKB

प्रधानमंत्री नरेन्द्र मोदी होर इस म्हीनें दे अखीरले एतवारें यानि 25 मेई गी आकाशवाणी पर प्रसारित होने आहले अपने महावार रेडियो कार्यक्रम मन की बात राए देश विदेश च रोहने आहले लोकें कन्ने अपने विचार सांझा करडन। एह इस प्रोग्राम दी 122मीं कड़ी होगा। लोक अपने विचार ते सुझा टोल फ्री नम्बर 800-11-7800 पर भेजी सकदे न। एदे अलावा लोक अपने सुझा ते विचार नरेन्द्र मोदी एप ते माई गोव ओपन फोर्म पर बी भेजी सकदे न। इन्दे च चुने गेदे किश सुझाएं गी प्रधानमंत्री होरें अपने कार्यक्रम च शामिल करडन। अपने विचार ते सुझा भेजेने दी अखीरी तरीक 23 मेई ऐ।

<><><><><><>

India-Ambassadors

रूस च भारत दे राजदूत विनय कुमार होरें मास्को च रणनीतिक संचार बारै लगगे दे अंतरराष्ट्रीय सम्मेलन दे पूरे-पराते इजलास च भाषण दिंदे होई मुल्लै दे संचार उद्योग दियें उपलब्धियें दा जिक्र कीता। राजदूत होरें कल मनुक्खी सभ्यता च संचार दे महत्व ते भूमिका बारै गल्ल कीती। उनें इस गल्ला गी बी उजागर कीता जे अज्जै-कल्लै दी तकनीकें कन्नै संचार सरिस्ते च कियां तब्दीली आई ऐ।

भारती निशानेबाज प्राची 5मीं थाहर पर रेई। प्रतियोगिता दी 50 मीटर राइफल प्रोन प्रतियोगिता च अर्दियन कर्माकर पैहले गै चांदी दा तगमा जिती चुके देन।

<><><><><><>

IPL

ते हून आई.पी.एल क्रिकेट। आई.पी.एल टी-20 च मुम्बई इंडियन्स दी टीम प्लेऑफ मकाबले च पुज्जने आहली चौथी ते खीरी टीम बनी गई ऐ। कल मुम्बई दे वानखेडे स्टेडियम च खेड्डे गेदे इक मैच च उन्नै दिल्ली कैपिटल गी 59 रन्ज कन्नै रहाइयै प्लेऑफ मकाबले लेई अपनी थाहर पक्की करी लैती। जिस्सलै जे दिल्ली कैपिटल्स दा आई.पी.एल 2025 दा सफर उत्थै गै खत्म होई गेआ। मेजबान मुम्बई नै टॉस हारेआ ते उसी पैहले बल्लेबाजी करने लेई आखेआ। जिनै 20एं ओवरें च 5 विकटां मोहाइयै 180 रन्ज बनाए। जित्त लेई लोड्डे 181 रन्ज दे लक्ष्य दा पिच्छा करदे होई दिल्ली दी टीम 18 ओवर ते 2 गेंदें पर गै आलआउट होई गई ते छडे 121 रन्ज गै बनाई सकी।

<><><><><><>